

আছমানি কিতাব হজরত মালাখি নবীর ছহিফা পরিচিতি

নাজিলর সময়: হজরত ইছা আল-মসীর জন্মর ৪৭০-৪৬০ বছর আগে।

হজরত মালাখি (আ:) আছিল একজন নবী। তান উপরে নাজিল অওয়াল অউ ছহিফা, পবিত্র কিতাবুল মুকাদ্দছর ইঞ্জিল শরিফ নাজিল অওয়াল আগ পর্যন্ত, নবী অকলর কিতাব-ছহিফার আখেরি ছহিফা। অউ ছহিফা নাজিল অইছে ছওয়াল-জুয়াপ করার লাখান, আলাদা এক কায়দায়।

ই ছহিফা নাজিল অওয়াল বউত বছর আগে বাবিলর বাদশায় জেরুজালেম টাউনরে দখল করছিল। তাইন জেরুজালেমর বাসিন্দা বনি ইসরাইল অকলরে দেশান্তরি আর বন্দি করিয়া তান বাবিল দেশে নিছলাগি। অউ সময় পবিত্র বায়তুল-মুকাদ্দছরে ভাংগিয়া বিনাশ করছিল। বনি ইসরাইলর গুনা আর নাফরমানির দায় আল্লায় তারারে অউ সাজা দিছলা। বাদে ইরান দেশর বাদশায় বাবিলর বাদশারে যুদ্ধত আরাইয়া, তারারে বন্দি থাকি আজাদ করিয়া হিরবার জেরুজালেমে আনছইন। তাইন বায়তুল-মুকাদ্দছরেও হিরবার বানানির ইজাজত দিলা যাতে আল্লার ঘরর লিঙ্কা-ছদগা, কুরবানি, এবাদত-বন্দেগি আগর নমুনায় চালু অয়।

অইলে এরবাদেও আল্লাওয়াল অউ ইছদি জাতি আস্তে আস্তে হিরবার আল্লার এবাদত-বন্দেগি থাকি দুনিয়ার বায় ফিরিগেলা, ইমানর কমজুরি পয়দা অইলো। অউ বয়ানি হজরত মালাখি (আ:) নবীর ছহিফার লাখান, হজরত নহিমিয়া (আ:) নবীর ছহিফার মাজেও মিলে। তারার নাফরমানির মাজে দেখা যায়, কাফির-মুশারিকর লগে বিয়া-শাদি, না-হক পথে টেকা-পয়সার লেন-দেন, যকাতর টেকা-পয়সা পবিত্র বায়তুল-মুকাদ্দছে না দেওয়া আর রুহানি আমল-তালিমর

বেয়াপারে খাম-খিয়ালি করা। আছমানি ছহিফা অকলর মাজদি মাবুদে তান বন্দা অকলরে যেলা হুশিয়ার করছইন, এর আখেরি হুশিয়ারি অইলো অউ মালাখি (আ:) ছহিফা। হজরত মালাখির (আ:) উফাতর বাদ থাকি, হজরত এহিয়া (আ:) আর হজরত ইছা আল-মসীয়ে তশরিফ আনার আগ পর্যন্ত, অনুমান চাইরশো বছর ই দুনিয়াত আর কুনু নবীর আওয়াজ হুনা গেছে না।

এরমাজে আছে,

- (ক) বনি ইসরাইলর বায় মাবুদর মহব্বত। ১:১-৫ আয়াত
- (খ) ইমাম অকলর নাফরমানি। ১:৬□২:৯
- (গ) আম মানষর নাফরমানি। ২:১০□৩:১৮
- (ঘ) মাবুদর বদলাইর দিন। ৪ রুকু।

1 মালাখি নবীর উছিয়ায় বনি ইসরাইলর গেছে মাবুদর ওহী।

বনি ইসরাইলরে আল্লার মহব্বত

2 ও বনি ইসরাইল, আমি মাবুদে কইরাম, আমি তো হামেশা তুমরাংরে মহব্বত করি।

অইলে তুমরা কইরায়, “তুমি কিলা আমরাংরে মহব্বত করলায়?”

তে হুনো, ইস কিতা ইয়াকুবর ভাই আছিল না নি? অইলে আমি তো তুমরাংর খান্দানর মুরবিবি ইয়াকুবরে মহব্বত করছি, 3 আর ইসরে হরাইয়া রাখছি। আমি তার পাড় অকল বিনাশ করছি, তার ভিটা-মাটি মরুভূমির হিয়ালর আখড়া বানাইছি।

4 ইসর আওলাদ ইদোমী অকলে কইতো পারে, “আমরাংরে চুরমার করা অইলেও আমরা ই চুরমার করা হকলতা হিরবার বানাইলিমা।”

অইলে আমি আল্লা রাব্বুল আলামিনে কইয়ার, তারা ইতা বানাইলেও আমি ভাংগিলিমা, ইখানরে কওয়া অইবো, ‘নাফরমানির দেশ, যে দেশর মানষর লগে মাবুদে হামেশা গুছা করইন।’

5 ই হালত তুমরাংর নিজর চউখে দেখিয়া কইবায়, “ইসরাইল দেশর সীমানার বাংরেও মাবুদর তাক্কত কাইম আছো।”

ইমাম অকলর গাফলতি

6 ও ইমাম অকল ছনো, আমি আল্লা রাব্বুল আলামিনে কইয়ার, পুয়াইশ্তে তারার বাফরে ইজ্জত করইন, চাকরেও তারার মালিকরে ডরাইন। অউ লাখান আমি একজন মালিক অইলে, আমার বায় ডর-খফ কুয়াই? আর আমি একজন বাফ অইলে আমার পাওনা ইজ্জত কুয়াই? তুমরাউ তো আমারে বেইজ্জত করছে।

অইলে তুমরা হিরবার কইরায়, “আমরা কিলা তুমারে বেইজ্জত করলাম?”

7 তুমরা তো আমার কুরবানি খানার উপরে নাপাক কুরবানি দিরায়া। দিয়া কইরায়, “আমরার কুরবানি নাপাক অইলো কিলা?”

তুমরা বুজাইরায় মাবুদর কুরবানি খানা কুস্তাউ নায়া। 8 আমি আল্লা রাব্বুল আলামিনে জিকাইরাম, কুরবানির নিয়তে তুমরা যেবলা আন্দা পশু লইয়া আও, ইতা কুন্ ঠিক অয় নি? আর লুলা-লেংড়া, বেমারি পশু কুরবানি দেও, ইতা ঠিক নি? তুমরার দেশর রাজারে অউলা পশু উপহার দিয়া দেখোছাইন, তইন খুশি অইন নি? আর তুমরার আবদার রাখইন নি?

9 ছনো, আল্লা রাব্বুল আলামিনে কইরাম, তুমরা আমার দরবারো রহমত মাংগিলে কুন্ লাভ অইবো নি? তুমরা যেবলা নিজর আতেউ অলাখান কুরবানি দেও, তে আমি আর তুমরারে রহম করমু কিলা?

10 হায়রে হায়! তুমরার মাজে একজনেও যুদি আমার বায়তুল-মুকাদ্দছর গেইট খানাইন বন্দ করিলতো, তুমরা আমার কুরবানি খানার উপরে বেকামায়া আঙুইন না জালাইতায়, তে আমি খুশি অইলাম অনো। অখন তো আমি মাবুদ তুমরার উপরে খুশি নায়া, আর তুমরার আত থনে কুন্ লিল্লা-ছদগাও কবুল করতাম নায়া।

11 ছনো, আল্লা রাব্বুল আলামিনে কইয়ার, দুনিয়ার এক মাথা থাকি আরক মাথা পর্যন্ত তামাম জাতির মাজে আমার কুদরতি শান কাইম অর। তামাম জমিনো আমার নামে আগর-খুশবয় জালানি অর, মানষে পাক-ছাফ লিল্লা-ছদগা দিরা। হকল জাতির মাজেউ তো আমার শান-শওকত কাইম আছে।

12 অইলে তুমরা আমার নামরে বেইজ্জত কররায়। তুমরা তো কইরায়, “মাবুদর কুরবানি খানা কুস্তাউ নায়, ই কুরবানির কুন্সু দামউ নাই।” 13 আমারে বেইজ্জতির নিয়তে কইরায়, “ইতা তো খামোখা কষ্ট দেওয়া!”

তে আল্লা রাব্বুল আলামিনে কইয়ার, তুমরা ডাকাতি করা, আর লুলা-লেংড়া, বেমারি পশু আনিয়া কুরবানি দিরায়ে, আমি কুন্সু অতা কুরবানি তুমরার আত খনে কবুল করমু নি?

14 আমি আল্লা রাব্বুল আলামিনে কইয়ার, কেউরর পালর মাজে নিখুত মেদা পশু আছে, অগুরে কুরবানি করার লাগি হে নিয়তও করছে, অইলে বাদে টগামি করি কুন্সু খুত-আলা পশু মাবুদর নামে কুরবানি দেয়, তার উপরে লান্নত পড়উক! আমি তো মহান বাদশা, তামাম জাতিয়ে আমারে তাজিম করে।

2

ইমাম অকল হশিয়্যার

1 আমি আল্লা রাব্বুল আলামিনে ইমাম অকলরে হশিয়্যার করি কইরাম, 2 তুমরা যুদি আমার কথা না হনো আর আমার ইজ্জত-তাজিমর বায় পুরাপুর খিয়াল না করো, তে আমি তুমরার উপরে লান্নত ফালাইমু। তুমরার হকল রহমতরেও গজব বানাইলিমু। আসলে তুমরা আমার কথা মানছো না করি অউ লাখান গজব অখনও ঢালিয়া আইয়ার। 3 তুমরার লাগি তুমরার আওলাদ অকলরেও সাজা দিমু। তুমরার ইদর কুরবানির পশুর গুফর-চেনা আমি তুমরার মুখে মাখাইমু, অতা মাখাইল হালতে মানষে তুমরারে হরাইয়া ফলাইবা।

4 আমি আল্লা রাব্বুল আলামিনে কইরাম, বুজিলাও, আমি তুমরার গেছে অউ হশিয়্যারি পাঠাইলাম, যাতে তুমরার খান্দানর মুরবিব লেবির লগে আমার কাইম করা নিয়ম জারি রয়। 5 তান লগে আমি যে নিয়ম করছলাম, ইকটা অইলো জিন্দেগি আর শান্তির নিয়ম। এরমাজে

ডর-খফর বেয়াপারও আছিল, যাতে তাইন আমাৰে তাজিম কৰইন, আসলেও তাইন আমাৰে তাজিম কৰতা।

6 মিছা না-হক কুস্তা কইতা না,

তান মুখো আছিল হক তালিম।

ষোলআনা খাটি রইয়া আমাৰ এবাদতি কৰতা,

বউতৰে নাফরমানি থাকি ফিরাইতা।

7 আসলে ইমামৰ কাম অইলো পাক কালাম হেফাজতে রাখা,

যাতে মানষে গিয়া তান গেছ থাকি অউ কালাম তালিম কৰে।

ইমাম অকল তো আল্লা রাব্বুল আলামিনৰ পেগাম্বৰ।

8 অইলে আমি আল্লা রাব্বুল আলামিনে কইরাম, তুমরা তো ই পথ ছাড়িয়া, মনগড়া তালিম দিয়া বউত মানষৰে আছাড় খাওয়াইছো। ইতা কৰিয়া তুমরা লেবির খান্দানৰ লাগি কাইম কৰা আমাৰ নিয়ম বরফেলাফ কৰছো। 9 তুমরা আমাৰ পথে না চলিয়া মানষৰ মুখ চাইয়া বিচাৰ কৰছো। এৰদায় আমিও তুমরাৰে তামাম মানষৰ ছামনে নীচা আৰ বেইজ্জত কৰছি।

হজরত মালাখি নবীৰ হশিয়াৰি

বনি ইসরাইলৰ এহুদা গুষ্টিৰ নাফরমানি

10 আমরা হকল এক বাফর আওলাদ নায় নি? এক আল্লায়উ আমরাৰে পয়দা কৰছইন না নি? তে আমরা কেনে একে-অইন্যৰ লগে বেইমানি কৰিয়া, আমরাৰ ময়-মুরবিবৰ উপৰে কাইম কৰা নিয়মৰ বরখেলাফ কৰি? 11 এহুদা গুষ্টিয়ে তো বেইমানি কৰছে। জেরুজালেম টাউন সহ আস্তা ইসরাইল দেশো বেজুইতা নফরতি কাম কৰাইছে। এহুদাৰ মানষে মূর্তিপূজা কৰরা পুড়িস্তৰে বিয়া কৰিয়া, মাবুদৰ মায়ার জাগাৰেও নাপাক বানাইছে। 12 যতো জনে ইতা কাম কৰে, তাৰা আল্লা

রাব্বুল আলামিনর নামে লিল্লা-কুরবানি লইয়া আইলেও, মাবুদে তান খাছ বন্দা অকলর খাতা খনে তারার নাম মিটাইলিবা।

13 আর তুমরা তো আরকটা কাম করো। চউখর পানিয়ে খালি কুরবানি খানারে ভিজাও, কান্দা-কাটি আর আহাজারি করো। আইলে তুমরা যেতা লিল্লা-ছদগা দেও, ইতার বায় মাবুদে তো খিয়াল করইন না, খুশি মনে কবুলও করইন না। 14 এরবাদেও তুমরা জিকাও, “কেনে কবুল করইন না?” কারন আইলো, তুমরার জুয়ানকি কালর বিবির বিয়ার আখতো মাবুদ তো সাক্ষি আইছিল। অউ বিবিউ তুমরার জিন্দেগির লগি, তুমরার কাবিন করা বউ। অততা বাদেও তুমরার ই বউর লগে বেইমানি করছো। 15 মাবুদে কিতা জামাই-বউরে এক কয়া বানাইছইন না নি? রুহে আর কয়ায় তারা তো তানউ ছামান। তারারে কেনে একখানো করা আইছে? তান খিয়াল আছিল, তারার মাজদি আল্লাওয়াল। এক খান্দান কাইম রইতো। এরদায় তুমরার দিলর বেয়াপারে হুশিয়ার অও, জুয়ানকির বিবির লগে বেইমানি করিও না। 16 বনি ইসরাইলর মাবুদ আল্লায় কইরা, “বউরে তালাক দেওয়া আমি ঘিন করি।” আল্লা রাব্বুল আলামিনে আরো কইরা, “জুলুমরে ফিন্নর কাপড়র লাখান ফিন্দিয়া, জালিমি ছুরতে যে মানুষ হাজে, তার কামরেও আমি ঘিন করি। এরদায় তুমরা তুমরার দিলর বেয়াপারে হুশিয়ার অও, বউর লগে বেইমানি করিও না।”

17 তুমরা নিজর জবানদি মাবুদরে তেখতো করিলিছো। এরবাদেও তুমরা জিকাইরায়, “আমরা কেমনে তানরে তেখতো করছি?” তুমরা তো কইছো, যেতায় নাফরমানি করইন, ইতা হক্কলটি মাবুদর নজরো ভাল। মানুষ, তাইন অতার উপরে খুশি। আরনায় কইছো, কুয়াই হউ আল্লা, যেইন হক ইনছাফ করইন?

3

কিয়ামতর লাগি হুশিয়ারি

1 হুনা, আমি আল্লা রাব্বুল আলামিনে ওয়াদা করিয়ার, আমি আমার পেগাম্বরের বেজিমু, তাইন আইবা, আইয়া আমার আগে গিয়া পথ ঠিক-ঠাক করবা। আর তুমরা যে মালিকর লাগি বার চাইরায়, তাইনও আখতাউ তান ঘরো তশরিফ আনবা। যে জনর লাগি তুমরা আশিক অইগেছোগি কইরায়, আমার নিয়মর হউ পেগাম্বরে তশরিফ আনরা।

2 অইলে তান তশরিফ আনার দিন, সইয্য করার হিন্মত অইবো কার? তান ছামনে উবানির খেমতা কার? তাইন তো হনারর আগুনির লাখান, ধুপার সাবনর লাখান। 3 হনারে যেলা সোনা-রুপারে জালাইয়া খাটি বানায়, তাইনও অউ বেশে বইবা। আর সোনা-রুপার নমুনায় লেবির খান্দানরে পাক-ছাফ করবা, খাটি বানাইবা। বাদে অউলা মানুষ থাকবা, যারা মাবুদর নামে ছহি নিয়তে পাক-ছাফ লিল্লা-কুরবানি আদায় করবা। 4 তেউ আগর আমলর লাখান জেরুজালেম আর এল্দা দেশর মানষর লিল্লা-কুরবানিরে মাবুদে খুশি অইয়া কবুল করবা।

5 আমি আল্লা রাব্বুল আলামিনে কইয়ার, হউ সময় আমি বিচার করার লাগি তুমরার গেছে আইমু। আইয়া যাদুগির, জিনাকুর, মিছা সাক্ষি দেওরা, কামলার বেতন টগরা, ডাড়ি বেটিন আর এতিমর উপরে জুলুম কররা, মুছাফিরর বায় হক ইনছাফ না কররা, মানি যতো জনে আমারে ডরায় না, তারা হক্কলর বিপক্ষে সাক্ষি দিতে আমি কুনা দেরি করতাম নায়।

আল্লার পাওনা আদায় না করার সাজা

6 ও ইয়াকুবর আওলাদ অকল, আমি মাবুদ, আমার জবানর কুনা রদ-বদল নাই, এরদায়উ তুমরা বিনাশ অইরায় না। 7 তুমরার বাফ-দাদার জমানা থাকিউ আমার হুকুম-আহকাম মানছো না, আর আমলও করছো না। তে তুমরা আমার গেছে ফিরিয়া আইও, আমিও তুমরার গেছে আইমু।

অইলে তুমরা কইরায়, “আমরা কিলা ফিরিয়া আইতাম?”

8 কুনা আদমে আল্লারে টগিতো পারে নি? অইলে তুমরা তো আমারে টগিরায়।

টগিয়া হিরবার কইরায়, “আমরা কেমনে তুমারে টগাইলাম?”

হুনো, তুমরা তো যকাত আদায় আর লিল্লা-কুরবানির বেয়াপারে আমারে টগিরায়।⁹ তুমরার আস্তা জাতিয়ে মিলিয়া আমারে টগিরায়, এরদায়উ তুমরা লান্নতর মাজে গাড়ি রইছে।¹⁰ তুমরার হকল রুজির দশ বাটর এক বাট আমার ভাভারো যকাত দেও, যাতে আমার ঘরো খানি-খুরাকি রয়। ই বেয়াপারে তুমরা আমারে পরিষ্কা করিয়া দেখিলাও, আমি আল্লা রাব্বুল আলামিনে আহমানর হকল দুয়ার খুলিয়া, তুমরার দরকারর চাইতেও বেশি, বেহিসাব বরকত দেই কি না।¹¹ আমি খেতি কররা পুক অকলরে বাধা দিমু, ইতায় তুমরার জমিনর ফসল খাইয়া বিনাশ করতা নায়। আর তুমরার ক্ষেতর আংগুর ফলও জরিয়া পড়তো নায়।¹² আমি আল্লা রাব্বুল আলামিনে কইয়ার, অলা করলে দুনিয়ার হকল জাতিয়ে তুমরারে মুবারক কইবো, তুমরার দেশ অইবো আরাম আর খুশি-বাসির দেশ।

¹³ অইলে আমি মাবুদে কইয়ার, তুমরা তো আমার বিপক্ষে কড়াকড়ি মাত মাতিছে।

মাতিয়া হিরবার কইরায়, “আমরা তুমার বিপক্ষে কিতা মাতিলাম?”

¹⁴ তে হুনো, তুমরা কইরায়, “আল্লার এবাদত করা তো খামোখা কষ্ট করা। তান হুকুম-আহকাম আমল করলে, আল্লা রাব্বুল আলামিনর গেছে মাথা নোয়াইয়া চললে আমরার লাভ কিতা? ¹⁵ তে অখন আও, আমরা বেটাগিরি দেখাওরা মানষরে ধইন্য দেই। অয়, অয়, খারাপ মানষেউ তো উন্নতি কররা। তারা আল্লারে পরিষ্কা করিয়াও তো রেহাই পাইলিরা।”

¹⁶ বাদে তারার মাজে যারা মাবুদরে ডরাইতো, তারা একে-অইন্যে বাতচিত করলো, আর মাবুদে ইতা খিয়াল করি হুনলা। মাবুদর ডর-খফ ঘেরার ভিতরে আছিল, যেরা খাছ দিলে তান ধিয়ান করতো, তারার নাম মাবুদর হামনে এক খাতাত লেখা অইলো।

¹⁷ আমি আল্লা রাব্বুল আলামিনে তারার বেয়াপারে কইরাম, আমার ঠিক করি রাখা দিন আইলে তারা আমার খাছ হামানা অইবা, তারা আমারউ বন্দা অইবা। বাফে তার খেজমত কররা পুয়ারে যেলা মায়া

করে, অউ লাখান আমিও তারারে মায়া করমু। 18 হউ সময় আরকবার তুমরা দেখবায়, পরেজগার আর নাফরমানর মাজে, আমার এবাদত কররা, আর না কররার মাজে আমি কত বেবধান করি।

4

মাবুদে বদলা দিবার দিন

1 হনো, আমি আন্না রাববুল আলামিনে কইরাম, হউ দিন আইওর, যে দিন ডমকার আণ্ডনির লাখান দাউ-দাউ করি জলবো। ই দিন হক্কল বড়াই কররা আর নাফরমান অকল নেরার লাখান জলবা, তারার জড় বা ডালপালা কুন্তাউ জলার বাকি রইতো নায।

2 অইলে তুমরা যেরা আমারে ডরাও, তুমরার উপরে দীনদারির সুররুজ উঠিবো, ই সুররুজর তেজর মাজে থাকবো শিফা। তুমরা গোয়লা খনে ছাড়া পাওয়া গরুর বাইচ্চার লাখান নাচিবায়। 3 আমি যেদিন অউ কাম করমু, ই দিন তুমরা নাফরমান অকলরে পাওদি উড়িবায়, তারা অইবা তুমরার পাওর তলর ছালি। ইখান আমি আন্না রাববুল আলামিনে কইলাম।

4 তুমরা আমার বন্দা মুছার শরিয়তর কথা ইয়াদ রাখো, আমি তুর পাড়র উপরে তামাম বনি ইসরাইলর লাগি যে হকুম-আহকাম তান গেছে দিছলাম, অতা মনো রাখিও।

5 হনো, মাবুদর হউ মহান আর বেজুইতা ডর-খফর দিন আইবার আগে, আমি মাবুদে ইলিয়াছ নবীরে তুমরার গেছে বেজিমু। 6 তাইন আইয়া মা-বাবুর দিল তারার পুয়া-পুড়িস্তর বায়, আর পুয়া-পুড়িস্তর দিল তারার মা-বাবুর বায় ফিরাইবা, যাতে আমি আইয়া হারি তারার দেশরে লান্নত ঢালিয়া বিনাশ না করি॥

খতম॥

Sylheti New Testament (Bengali)
Sylheti: Sylheti New Testament (Bengali) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 30 Sep 2022 from source files
dated 13 Jun 2022

8c22fe10-239b-5db1-b41d-13aad0957f43